



DEO OPTIMO MAX.

UNI ET TRINO,

VIRGINI DEI-PARÆ, ET S. LUÇÆ,
Orthodoxorum Medicorum Patrono.

QUÆSTIO MEDICA.

QUOD LIBETARIIS DISPUTATIONIBUS,
manè discutienda in Scholis Medicorum, die Jovis decimâ-sextà
mensis Novembris, Anno Domini M. DCC. XLVII,

M. JACOBO-LAURENTIO MAUROY,

Doctore Medico, Præsidente.

An Febris, Natura curationem molientis, instrumentum?

I.



UÆ ex mutuâ functionum corporis inter se harmoniâ atque concentu, enascitur vitæ vis & actio, nomine Naturæ à Medicis designatur. Ab illo rerum, ut vocant, naturalium consensu, torpenti miracula, quor apud antiquos Naturæ adscribuntur. In eâ confusio nem unam, conspirationem unam, consensientia omnia, jamdudum pinxit Hippocrates. Hinc illa nascitur efficacia quâ ruit altera in alterius auxilium actio, seseque mutuò tutantur, & ab hostium undiquè insultantium injuriis, vindicant acerrimè. Id sensere ab ipsis artis incunabulis Medici, quos dudum in sui admirationem Natura rapuit, quæ nullo Doctore, nullis informata præceptis, om-

A

nibus omnia sufficeret, & sese morborum medicatricem profiteretur. Sic ipsi ancillari artem sapiens voluit Hippocrates, ut quicumque duceret illa, huic vergendum foret, nisi omnia temerè prorsus & sine consilio vellet insituere. Hujus autem efficaciam in Naturam principium duplex; alterum à corporis conditione mechanicà pendet; alterum ab admirandâ sentiendâ proprietate, animali soli concessâ, ducit originem. Proprios utrique causarum generi effectus distinguere non erit arduum. Quæ enim à solâ corporis mechanicâ oriuntur phænomena, ea corpori cuicumque iisdem proprietatibus prædito communia, vel motum liquidorum spectant, vel eorumdem alterationem. Illud porro Hydraulices, hoc verò Chymicæ, enodare est. His faciem præferentibus & sanguinis circulantis, & alimentorum in sanguinem conversionis mysteria recluduntur. Quæ verò ab animalium actionum fonte derivantur phænomena, ea tot sunt Naturæ conamina quibus aut ad vitam protrahendam, perenni actione nititur, aut ad doloris deviationem ac malorum semina rescindenda efficaciores conatus elicit. Nonnè vides quâ curâ acre inimicum contemperet, eluat, eliminat? Sed minora conamina, si non sufficerent, brevi majora tentantem videbis: quamdam in sanitate crismis molietur, & nunc sternutationem, nunc vomitum magno apparatu efficit. Quid si ulterius salutaria ejus insectemur molimina; vix unquam deficere deprehendes. Nunc eadem labanti per pulmones circuitui prospicit, & oscitatione motum sanguinis adauget, nunc intrâ musculos hærenti, stimulos incutit; hinc pandiculationes, quarum ea est efficacia, teste Sanctorio, ut dum vigent, „plus intrâ dimidiæ horæ spatium perspiret homo, quàm per horam alterius temporis.

At nunquam majori molimine hostem adoritur Natura, quàm si utrumque causæ genus, conjuratis viribus in ipsum debellandum uniatur, & sensibilitas adaucta mechanicarum actionum adaugeat efficaciam. Tunc vera Naturæ concitari instrumenta, augeri motus, & hinc effectus ipsius incrementum; quæ si in parte tantum peculiari peragantur, erethismus constituitur: si verò & cor ipsum & vasorum compages partem oneris sibi fuscipiant, febris accenditur. Hæc cõte Naturæ curantis instrumentum audire debet, si liceat à naturâ curationem expectare.

II.

ENIMVERO Naturæ curantis efficaciam evincere facile est. Symptomatum enim quæ morbo superveniunt, origo duplex. A causâ morbi pendunt alia, alia à vitæ residuæ viribus. Priora causæ lædenti semper proportionalia reperies, & pro diverso ejus impetu, diversâ ferocitiam violentiâ. Posteriora, quò sanitatis plus superest, eò etiam plura, in ægri bonum, consentiunt. Ab his illis-vè exuperantibus, certum & constans salutis aut exitii præsagium deducitur. Ex accuratâ enim ipsorum inter se comparatione, an vita morbo prævaleat, an contrâ ab ipso oppressa vincatur, elucescit. Hinc illa fluxit à solius naturæ contemplatione pendens, ars antiqua præfagiendi, tam firmis olim nixa principiis, ut tempus & horam, tum mortis tum sanationis præfagire certò Galenus noverit, de quo palàm Philosophus Eudemus exclamabat, vaticinari per Galenum voluisse Pythium Apollinem.

Frustrâ quidem Naturæ curantis requiras vestigia, ubi à morbi ferocia, quasi torrentis impetu abrepti homines jugulantur, ut in foro à peste prostratos meminit Sydenhamus. Sed vulgò in ipsâ ejus etiam oppressione aliqua relucantis adhuc vitæ signa, ut plurimum reperias. Sic ipsâ etiam in

morte sese recolligunt, sic in ultimo virium stadio, rigores non recalescentes, Natura concitat. Sic, paucae manant stillae sanguineae, infelix crisis, & quae virium prostratarum imbecillitatem, in apertum prodit. *Hinc judicatoria non judicantia partim lethalia, partim difficilis judicii* ait Hippocrates, & nil paucum criticum Galenus aperte pronuntiat.

At ubi plus de sanitate superest, aut è medio malorum, signa salutis affulgent optima, quae scilicet circa cruditatem concoquendam, Naturam occupari demonstrent; ut est in urinis crassities, & mox hypostasis, & cuncta ad aegri euphoriam componantur, salutare ferendum erit praesagium: morbus sanabitur. Verum causis laedentibus proportionale Naturae conamen non unam curationis viam affectat; alios morbos lentis attenuat ictibus, alios verò, viribus in unam dimicationem collectis, proterit. Priores ut securioribus signis incedunt, sic minore solvuntur apparatu; posteriores ut vitam in apertum conjiciunt periculum, sic è medio malorum & terroris sanitatem demonstrant emergentem. Parvi morbi solvuntur solum, magni verò judicantur. At utraque naturae methodus aequaliter demonstratur.

Et enim si nullos solvit Natura morbos, omnes medicamentis curantur; quod illa sibi non arrogat. Prima est & antiquissima Medicinae pars dieteticae, quae solà curari posse magnos & plurimos morbos asserit Hippocrates; hanc non scripta sed innata lex edocuit. Odium scilicet crassioris alimenti febricitantibus incutit Natura; hinc nutrire impura haec corpora, laedere est.

Porrò si diatà sanantur, nonne totum opus Naturae adscribendum? Hae solà methodo, Naturaeque nunc fræna nunc stimulos admovendo Sydenhamus, febrem illam quam genuinam primariamque putat, & describit è praescripto naturae, spatio quatuordecim dierum, desumationis tempora peragentem, tollere consueverat; talem pinxerat Hippocrates in Thaso, annotante Clar. Freind. Ab Hippocratis igitur ævo ad usque Sydenhami tempora, Naturae solius ope curabatur hæc febris, nec ullum ad ipsam debellandam innovit Sydenhamo specificum; quis autem à Clar. Viri temporibus breviorum ipsam quatuordecim diebus effecisse audeat gloriari? Nec solum è morbis hunc esse credideris, cui non alios ars novit limites imponere, quam quos imperat ipsis Natura. Magnum est quod jam mitius & mollius sub artis imperio sua tempora peragent. Quid demùm si Natura morbos non solvit, aut ab anni tempestate, aut ab ætate sperandum habemus? Vere dum natura recluditur, omnes qui per hyemem viguere morbi fugantur, & disperiunt. Quartanas arti rebelles ver solvere videbat Sydenhamus. Pariter, in quam vix aliquid Medicina potest, juvenilis epilepsia ad annum vigesimum, ex Hippocratis observatione terminatur. Hinc qui in juvenibus tam facile coquuntur catharri, senibus commoriuntur, Naturam scilicet senescentem.

Nec fas erit salutari depulso judicio morbos non agnoscere. In crisisbus eadem legum constantia reperitur, eadem causæ morbificæ analogia, efficacia eadem.

Constantiam legum in crisisbus ex earum doctrinâ erit deducere. Hinc fuit olim ars crises prædicere. Sic generatim in vigore morbi accidunt, aut incremento; si non præcesserit coctio, in mortem certò terminantur. Si coctio prægressa sit, omnia in tuto sunt posita: neminem ablatum morbo vidit Galenus, in quo coctionis signa prægressa fuerant; eandem demùm constantiam legum in crisisbus id unum demonstrat, quod quæque crises sua signa sibi propria habeant, quæ si generalia tantùm & omni crisi communia apparuerint, alvum fluxuram certò prædixeris.

At morbo servare debent analogiam: præter rationem levantibus, non

usquē fidendum. Pituitosis morbis familiares sunt sudores, ardenti febris aut phrenitidi sæpè & pleuritidi dicatur Hæmorrhagia: lethargus per abcessum judicatur, abcessus longis pariter febribus peculiariter dicatur.

At demùm crīsum ea est efficacia, ut dùm morbum tollunt, si cohibere ipsas arte præposterā volueris, vel ægrum ad extrema redigant, vel sæpè etiam nullā arte præpediri possint. Pius quidem demonstrat abcessum delitescens tum noxa, apud coacas prænotiones adeo iufamis. Posterius verò evincit inter alias pulcherrima Swietenii observatio de viro periculossimā anginā laborante, cui parū aut sectæ in talis & brachiis venæ, aut nuchæ & scapulis scarificationes adhibita profuerant, dum morbum solveret copioso fluxu superveniens hæmorrhagia. At in his, si veteribus parū fidas, omnino demonstratorem perficiet eruptivorum morborum doctrina; an, eruptionem arcere, Medicis datum, aut factam sine magno discrimine repellere? Contemplatur Medicus naturam, & nunc illam speculator otiosus curantem admiratur, nunc tardat præcipientem aut impellit morantem. Tot rerum momentis percussus ex altiori meditatione Sydenhamus concludit, » Errare illum, sed errore non erudito, qui Naturam artis adminiculo semper indigere existimat; namque id si fieret, parcius illa humano generi » prospexisset, quàm postulat speciei conservatio, cum nec minima sit portio inter morborum ingruentium frequentiam, & facultates quibus » pollent homines ad eisdem fugandos, vel iis sæculis quibus ars Medica » maximè caput extulit.

III.

AT variā symptomatum larvā sese ex oculis sciscitantium Naturam subducere nē credideris. Quò simplicior est mechanismus, eo dignitatem artificis magis arguit. Sive solvatur morbus, sive subita crisi tollatur, utrumque hoc febris perficit.

Enimverò quid est febris præter intensioris vitæ efficaciam? Motus cordis & arteriarum, sanguinis efficiens circuitum, vitæ ideam absolvit; febrim verò motus idem, sed intensior, constituit. Causa eadem est, ergò & effectus iidem. Porro totis in id unum viribus, incumbit Natura, ut cruda, parvā simul copiā, intrā sanguinem delata concoquantur, sive quod idem est, ita alterentur, ut quæ in animalem assimilari substantiam possunt, in ipsam vertantur, partes verò huic mutationi impares, debito ordine, copiā, qualitate, excernantur. Si ergò rerum externarum vitio consuetas naturæ vires aliquid superaverit, id superest, ut semper magis magisque lædatur homo, vel quâcumque demùm arte natura vires intendant, novosque conatus exerat; quos si debilior negaverit, sit *τροφη* et *τροφη*, sive non vertitur in alimentum, alimenti materies, aut non expulso quod redundabat, jam aliquid à nativā principiorum contemplatione excedit, eminet & per se existit. Adest ergò ἀνεπὶστὸν, ἐκλεπτικὸν Hippocraticum quod se naturæ adversatur. Irritata igitur natura orgasmos, erethismos, febres concitat, & vires ex ipsorum penu depromit. Mirum certè artificium ab Hippocrate per observationem deprehensum, à Sanctorio per stateram demonstratum, à recentioribus demùm per mechanicas sanguinis circulantis leges enodatum. Febrem ergò, quæ robustior est Natura, tardiùs; celerius verò, quæ debilior est, advocat; nonne vides ut dura messorum illa secalinum panem vix fermentatum vorent, nec lædantur tamen? Lac verò quod parvā copiā phytiscus ebibit, ipsi febriles æstus commovet. Usque adeo verum est Hippocratis esatum illud; alimentum unum & non unum. Hinc medicamenta debiliū robustis vertuntur in alimoniam, hinc pendet illa, quam primus mortales idem

edocuit, alimenta inter & exercitium, ut potè Naturæ robur addens, servanda proportio, statèrâ postea Sanctorianâ confirmata at stabilita. Atenim si rem propius scrutemur, causâ solâ differt ab exercitio Febris. Hoc naturale quoddam Febris genus constituit, hæc præter naturale exercitium. In eo supplet erethismum motus musculorum, in illâ motum musculorum supplet erethismus; utrique verò communis est vitæ intensitas; unde effectus iidem, stagnantium agitatio, crudorum coctio, redundantium expulsiõ.

Præterea verò ita pressò pede Naturæ vires in morbis Febris insequitur, ut instaurata harum instauratarum indicium sit certissimum, oppressis à plethorâ, pariter opprimatur, à morbo devictis, evincatur, elanguescantibus, elanguescat, febremque in hoc triplici casu, dum Medicus salutem præfert, accendat.

Oppressò à plethorâ motu cordis, impeditâ vasorum meabilitate, languet sanguinis circuitus. Jam verò restituatur per scalpellum Chirurgicum, sanguini effugium, Febris accenditur. Nunquam autem ardentiorẽ se visidisse refert Sydenhamus, quàm quæ in oppressò antea juvene, post venæ sectionem sequebatur. Hoc titulo variolarum eruptioni favet, dum vasorum restituit actionem, & minorum à majoribus compressionem tollit. Hinc ipsâ prægressâ per corporis aream dispersas mirantur præctici vesiculas; sicque liberatis Naturæ viribus ipsas adauget idem auxilium, quod totiẽ easdem arte præpostera pessimè imminuit.

At si præ debilitate langueant illæ, si oneri ferendo impar Natura febrem aut nequeat excitare, aut talem tantummodò concitet, quæ causæ morbi- ficæ debellandæ non sufficiat, adfunt in arte auxilia, quæ vires excitent & naturam ad opus videantur revocare. Hæc roborantium nomine generico designata, resides propellunt humores, tono solidis addito. Hinc faciliior quaque secretio, coctio perfectior. Hæc olim in variolis adeò decantata rectè quidem ad ipsarum eruptionem conferre possunt, si propter debilitatem natura ipsam renuat perficere; at pessimi veneni titulo rejicienda sunt, si ob vires oppressas aut compressa vasa variolæ nequeant erumpere. Scilicet per auctum cordis & artieriarum motum potissimum agunt. Hæc est ergò ipsorum actio ut febrem excitent, & vitam adaugeant. Unde ipsorum ope damna per præposteras vacuationes inflicta reparabat Sydenhamus. His pariter utimur in chronicis dum elanguido vasorum tono nescit agere natura & per irritantia febrem salutarem inducimus. Usu illorum pravo febres intermittentes in continuas & ardentissimas verti visæ sunt, in Rusticis præsertim, qui ipsis ad promovendos sudores abutebantur. Hinc solo Theriacis incongruo usu, quartanam simplicem in triplicis naturam vertendam, prædixerat, ut eventit, Eudemo, Galenus.

Quod si verò devictæ vires fuerint à materiâ morbi, aut tantæ veneni quantitati expugnandæ, conamina Naturæ non respondeant, tùm exundat undequæque morbi materia nec dubiis se putredo prodit indiciiis, pulsus elanguet, torpent vitalia; in omnia sese insinuat viscera mali labes; hinc stomacho nausea, cerebro deliria, inconditi musculis motus & subsultus, tùm undique judicatoria non judicantia, pustulæ, vibices, petechiæ. Turgere materiam tunc cum Hippocrate verè dixeris, artisque celerrimam opem implores, minuendæ sunt undequæque hostis copię, & foras quæcumque educendæ. Quidquid detrahes, virium augmento detrahes; hinc in pessimis hujusmodi variolis catharticorum & cantharidum efficaciam prædicat Cl. Freind. Hinc illa olim in peste tanto successu adhibuit Hercules Saxonia; & meritò, cùm & simul pulsui per morbi dominium debilitato excitando apta nata sint,

& materiæ morbificæ effugium simul efficaciter procurent. Hinc igitur quoties oppressa, debilitata, devicta, est Natura, febris pariter opprimitur, debilitatur, evincitur; uno verbo proportionales sunt naturæ viribus, febris vires; & hinc in bonis judicationibus pulsus evidenter fieri vehementiores Galenus annotabat; ab eâ igitur quæ concitantur symptomata tot sunt agentis naturæ signa; nec illa meliori jure terrere Medicos poterunt, quam quæ crisi, coctione prægressâ, jam apparituræ, superveniunt.

Non ea ergo symptomata quæ morbo febrique consona apparebant, antiquos terruere; sed ea quæ ab ægri naturâ aliena, & oppressam febrem & deletas naturæ vires demonstrabant; sic phrenitidi supervenire comata ducebant exitiosum, aut eadem in vehementer trementia finire; quis non ægro summo perè timeat, si calidissimo morbo supervenire frigus viderit? Tum, nisi tamen criticè excitatur, æquabilem valorum inæabilitatem perisse id indicio est. Hinc author Prorrhetic. ait, lethalia censenda sunt ea frigora, quæ calidissimis morbis superveniunt. Unde aduri interiora, exteriora verò frigescere, exitiale omnino censebant, ut & in ardenti morbo non sitire ægrotatem, ut pote quod aut sensum abolitum, aut vires elanguidas, omnino prænuñtiaret. Idem ex singulis ipsorum præfagiis apparebit. Generatim pulsus sit à Facultatis robore, inquit Galenus, qui quò robustior est eò ipsam robustiorem indicat, languidissimus verò, tardissimus, rarissimulque omnis pessimi. respirationis facilitatem magnam vim ad salutem habere in iis morbis qui cum febre sunt, scribit Hippocrates, & timere vetat in arte præfagiendi post Hippocratem & Galenum fortè maximus Prosper Alpinus, in iis morbis in quibus pulsus magnitudo, respirationis libertas, & ciborum appetitus in ægri sanationem consenserint.

I V.

NEC certè ulla erat ratio, cur febris tanto exciperetur animorum terrore. Dudum enim observatione deprehensum fuit & ipsam sæpe optimarum in corpore mutationum causam esse, imò & quæ in ipsam conjiciuntur crimina, ea ut plurimum, vel ab intensiori illius gradu, vel ab ejus causæ malignitate esse repetenda.

Enimverò quàm salutari Naturæ molimine inducatur febris, nemo diffitebitur, qui quot ab ipsâ morbi expugnentur, quot-vè ab eâ imprudentius cohibita, damna sæpe insurrexerint, nobiscum collegerit. Sive enim acutorum affectuum sive chronicorum catervam lustraveris, idem erit. In acutis enim nonne quotidianum est illud, diris stipatum symptomatibus, frigus febrile à calore proportionali tolli, quamdiù valet Natura & potis est vim vi repellere? Hinc omina quæ pessima ferebantur, tempore frigoris, omnia si tandem calor emergat, evanescunt irrita. Nullum unquam à febre intermittenti sublatum videris, qui semel ad caloris stadium pervenerit, annotante Sydenhamo. Sed quid atrocius, quid per motus absurdos humanitatem magis terreat convulsione? Ità à febre tollitur, dictitante sic Hippocrate, ut illi nihil sit metuendum cui convulso febris quæ non adfuerat antea, supervenit, aut jam antea existens, exacerbatur. Nec mirum; convulsiones illæ, & artuum jactationes, Naturæ sanguineum molientis circuitum, sunt ut plurimum conamina. Sed horum efficaciam febris actioni ne contuleris? Hæc quando invadunt impetu, tantâ celeritate deservescunt. Febris verò, lento æquabili, continuato nixu, materiam sensim sine sensu contundit, attenuat, & vires tempore compenstat. Quid? Si aliud acutorum genus contemplerur, lethargos, comata, somnos præternaturales; majus horum periculum inde deducetur, quòd febre careant; imò ipsi è naturâ suâ advenfentur, Horum prin-

ceps apoplexia jam solutioni proxima est ubi febri Natura valet excitare; ex oraculis Hippocraticis. Idem de crapulâ monuit. At in chronicis non minori ægotantis bono, febris sæpe sæpius accenditur. Quis arri rebellem non ingemuerit epilepsiam? ipsius tamen à quartanâ sanata, habentur exempla. Nullum caulorum varietate, aut periculi immanitate, mali genus metuendum magis, cordis palpitationibus, has tamen in seipso à quartanâ sanatas refert Cl. de la Hire. Nec plura addam de modo quo eadem ad longevitatem disponit, ex observatione Boerhaavianâ. Quid multa? Id generatim asseri potest, quod in chronicorum curatione febris tanti sit pretii, ut ipsam datâ operâ quoties incumbit peragenda curatio, accendant practici. Nec aliâ agendi ratione chronicorum affectuum Mars audit Panacæa. Aliunde à febre incautius suppressâ, quot mala pendeant nos edoceat Cl. Van-Swieten. Hic importuno Kinækinæ auxilio supervenisse refert, inania per menses naturæ conamina, pandiculationes, oscitationes, Borborygmos. Hæc enim longo tantum temporis tractu perficiebant, quod paucis diebus à febre perfectum fuisset. Imò mortem ipsam febri incautè suppressæ supervenisse author idem est; dum enim febri intermittenti compedes injiciebantur, deposita in hepar morbi materia ipsum lentâ tabe peredebat, & primo vere actis in motum liquoribus, colliquefaciebat. Quàm atrocia mala, quàm celeri passu superventuram mortem censes, si febre variolas molientem suppresseris? Si contra Naturæ manum porrexeris, brevî omnia in tuto posita deprehenduntur. His argumentis febre expetendam esse quotiescumque materia morbifica corpus opprimit, demonstrasse nos confidimus. Id superest ut tantorum ream malorum à crimine vindicemus.

Et certè quantumvis sæpè horribili aspectu timenda appareat; hæc tamen symptomata ex ejus essentia dicenda non erant. Pleraque in causam refunduntur. Scilicet hæc vel febri potentiùs obstat, vel nervei principii vires obrundit, vel contrâ ut, læso tendine, in abnormes & convulsivos motus abripit. Tam effera mala, in causam conjicias, non in febrem. Febris ipsa gradu tantum peccat, qui si debilior, expugnando morbo reperitur impar; si violentior, mala plura profert, vel à liquido nimio perè expanso vel à subtilissimi liquidi distillatione pendencia. A priori, exurens ardor, variarum partium pressio, humorum putrida degeneratio. A posteriori, ingens ariditas, & immeabilitas liquidî. Unde in minoribus vasculis stases, corruptiones, in majoribus anxietates, tot mortis, ut ita dicam, elementa. At nonne liquidis nimio perè rarefactis injici compedes potuere, aut in locum deperditi tenuissimum suppeditari fluidum? Victum humidum febricitantibus omnibus idèd convenire dixit Hippocrates. Nonne spissum illud inflammatorium lenissimis Boerhaavi saponaceis attenuari? At quæ pessima ab hac posteriori origine inducuntur mala, quandiu fervet febris, non apparent, sed ab ipsâ deservescente inducuntur. Ubi verum in ardentissimo morbo pulsus elanguerit, phrenitica in vehementer tremencia abierint, ubi decubitu supino, sparsis neglectim artubus, ore hiant, prostante collo, jacuerit æger, tunc conclamatum est, febreque per morbum devictâ, Natura brevi devincetur.

V.

PLURIMA quidem Naturæ tribuimus; nihil tamen artis dignitati detrahi credas, aut ipsius operam vilescere. Sibi tantum noceant qui calumniantur illam; nos iagenti ejus amore perculsi, ipsam promovere omni ope atque operâ contendamus. Naturâ curante, non minor negotii pars regenda Medico adhuc incumbit. Tot undique accendi hostes, tot removenda impedimenta; vulneris labra suo glutine adunat Natura, at jungenda priùs aptè fuerant, & in situ retinenda. Frustrâ callum ossi fracto tentet

inducere, nisi prius arte Magistrâ in suum fuerint locum reposita & colubita. Jamdudum carnis generandæ opificem Naturam Galenus dixerat; illam certè nulli mortalium contigit imitari. At aderat regenda suppurationi, aderant præcavendæ tot incumbentium undique exteriorum injuriæ. Dum febris Naturæ præcepta servat, lenique passu incedens, nec stimulis indiget, aut fræno; diætâ adhuc præscribere rectamque rerum externarum moderationem, non concessum omnibus. Hos maximè probabat Hippocrates Medicos, qui in diætâ præscribendâ non errarent, tum & illos non minini faciendos putabat, qui quàm minimùm errarent. Hinc tot illius circa hanc dirigendam præcepta. Generatim gravia magis peccata ab inediâ, quàm à paulò majori copiâ pendere. Tunc tenuissimam esse præscribendam, ubi morbus ad summum pervenerit à principio statim minuendam, adaugendam sensim in declinatione. At cibum semper ægroto paulò gratiorem quantum-vis paulò deterius, esse præferendum. Ætati, denique, tempestati, consuetudini, morem esse gerendum. At vulgò habet aliquid ars salutaris quod addat aut detrahat. Porro quantum in regendâ Naturâ, consilii requiritur, atque prudentiæ, tantùm maturè festinantis audaciæ ne quid aut præcipitantiùs aut timide nimis instituat. Occasio præceps. Hinc verum Medici honorem in eo repositum asserbat Boerhaavius, ut sese obsequentem diceret Naturæ servulum. Nec tamen meram mortis meditationem nobis exprobrat Asclepiades; servitutis vincula licet aliquandò parrumpere. Imò fortis est Medici Naturam interdum spernere, hinc inter ejus antistites, quo vix obsequiosior alter, Sydenhamus ipsi aut in peste aut in pleuritide fiduciam adhiberi vetabat; sed in illâ protrahitis per 24 horas sudoribus fidebat unicè, in hac verò scalpello Chirurgico curationem perficiendam relinquebat.

Quin imò ipsam aliquandò errantem in viam revocari, ultro fatebimur. Nocet aliquandò à causâ absurdâ concitata febris, & ipsam accendi oninosum. Hinc parvo vulnere ipsam supervenire, Celsus habet exitiosum, nec mirum: cum vel nervos vel tendineas exquisitè sensilitatis partes, læsas esse, non obscurè significet. A retractione enim fibrarum dolor ingens, qui totam humanitatem disturbat; tunc omnia susceque ferri, febris accendi, causæ quidem tollendæ dicata, sed impar. At ferociet illa donec à morte proximâ vincatur, & machina dissolvatur omnino. At sublata causâ, sedatoque Naturæ dolore, tum febris pacatur, quæ cum nullam causæ lædenti mechanica connexionem obtineret, ab errantis etiam Naturæ viribus fuisse concitatum concludendum est.

Ergò Febris, Naturæ curationem molientis, instrumentum.

DOMINI DOCTORES DISPUTATURI.

M. Paschasius Borie.

M. Franciscus-Nicolaus Gaudier.

M. Henricus-Franciscus Bourdelin, Scholarum Professor designatus.

M. Ludovicus-Florentinus Belot.

M. Franciscus Bidault.

M. Achilles-Franciscus Fontaine, Chirurgia Gallico idiomate Professor designatus.

M. Ludovicus Pathiot.

M. Joannes-Claudius Munier, Consiliarius Medicus Regis ordinarius, & Domus Regiæ Invalidorum.

M. Joannes-Baptista Chomel, Medicus Regis ordinarius & rei Herbaria Professor.

Proponebat Parisiis ANNA-CAROLUS LORRY, Parisiensis, Saluberrimæ Facultatis Medicinæ Parisiensis Baccalaureus,
A. R. S. H. 1747, à sextâ ad meridiem.

Typis QUILLAU, Universitatis & Facultatis Medicinæ Typographi, 1747.